

MESYUARAT KEDUA, PENGGAL KETIGA
PARLIMEN KEEMPAT BELAS
2020

HARI KHAMIS : 27 OGOS 2020

JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 13 HINGGA NO. 42)

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS
TAHUN 2020**

PERTANYAAN : LISAN

**DARIPADA : YB PUAN RUBIAH BINTI HAJI WANG [KOTA
SAMARAHAN]**

TARIKH : 27 OGOS 2020 (KHAMIS)

SOALAN

PUAN RUBIAH BINTI HAJI WANG [KOTA SAMARAHAN] minta **MENTERI SUMBER MANUSIA** menyatakan pendekatan terkini Kerajaan menangani isu kehilangan pekerjaan dan pengangguran khususnya dalam tempoh Perintah Kawalan Pergerakan.

JAWAPAN

Tuan Yang di-Pertua,

1. Umum mengetahui kesan pandemik COVID-19 telah mengubah lanskap ekonomi serta pasaran pekerjaan dunia. Malaysia tidak terkecuali daripada menerima impak tersebut yang mengganggu-gugat ekosistem penyaluran bakat negara.
2. Data terkini oleh Jabatan Perangkaan Malaysia (DOSM) menunjukkan bahawa kadar pengangguran Malaysia menurun kepada 4.9% pada Jun 2020 (berbanding 5.3% pada Mei 2020).

Tuan Yang di-Pertua,

3. Bagi menangani isu kehilangan pekerjaan dan pengangguran, Kerajaan telah melaksanakan pakej-pakej rangsangan ekonomi seperti Pakej Rangsangan Ekonomi Prihatin Rakyat (PRIHATIN) dan PRIHATIN PKS TAMBAHAN.
4. Antara langkah segera Kerajaan dalam menangani isu pengangguran akibat pandemik Covid-19 ini adalah memperkenalkan **Program Subsidi Upah (PSU)**. Program ini bertujuan untuk membantu majikan dalam semua perusahaan yang terkesan daripada segi ekonomi akibat wabak COVID-19 supaya mereka dapat meneruskan operasi syarikat dan tidak memberhentikan pekerja.
5. Sehingga 21 Ogos 2020, PERKESO telah menerima sejumlah 329,648 permohonan daripada majikan melibatkan **2,701,675 orang pekerja** yang **telah menerima manfaat** daripada bantuan **Program Subsidi Upah (PSU)** melibatkan pembayaran sejumlah **RM8.94 bilion**.
6. Antara inisiatif lain yang dilaksanakan oleh Kementerian adalah **Program Pengekalan Pekerjaan (ERP)** melalui PERKESO. ERP

menyediakan bantuan segera (*immediate financial assistance*) sebanyak RM600 sebulan kepada majikan bagi setiap pekerja yang diminta bercuti tanpa gaji (CTG) akibat penularan COVID-19.

7. Sehingga 21 Ogos 2020, **seramai 340,252 orang pekerja** yang diberikan notis Cuti Tanpa Gaji telah **menerima manfaat** menerusi ERP yang melibatkan bayaran **sebanyak RM209.74 juta**.

Tuan Yang di-Pertua,

8. Sebagai tambahan, pada 5 Jun 2020, YAB Perdana Menteri telah mengumumkan Pelan Jana Semula Ekonomi Negara (PENJANA). Bagi menangani isu kehilangan pekerjaan dan pengangguran, 4 lagi inisiatif dilaksanakan melalui PERKESO dan PSMB iaitu:

- (i) Menaik Taraf Portal Perkhidmatan Pekerjaan Negara;
- (ii) Program Insentif Pengambilan Pekerja dan Bantuan Latihan;
- (iii) Perlindungan Sosial dan Latihan bagi Pekerja Ekonomi Gig; dan
- (iv) Insentif Pengaturan Kerja Fleksibel.

9. Kerajaan juga telah menubuhkan Jawatankuasa Khas Pekerjaan Nasional untuk menyelaraskan dan memantau pelaksanaan kesemua inisiatif berkaitan pekerja di bawah PENJANA.

10. Jawatankuasa yang dipengerusikan bersama oleh Menteri Kewangan dan Menteri Sumber Manusia ini dianggotai wakil-wakil daripada sektor swasta dan sektor awam yang berkaitan.

11. Mesyuarat JKPN merupakan satu platform atau medium untuk **menyelaras dan memantau pelaksanaan inisiatif - inisiatif PENJANA**.

12. Susulan itu, Kementerian Sumber Manusia juga telah melancarkan Inisiatif PENJANA HRDF pada 22 Jun 2020. Salah satu skim daripada

SOALAN NO : 13

inisiatif tersebut adalah ***Place & Train*** yang memberi jaminan penempatan pekerjaan setelah pelatih menamatkan latihan.

13. Kumpulan sasar yang akan dilatih meliputi golongan graduan dan pelajar lepasan sekolah yang akan mengurangkan isu pengangguran dalam kalangan belia serta pekerja yang diberhentikan.

14. Dijangkakan seramai 40 ribu rakyat Malaysia akan beroleh manfaat dari inisiatif ini dan mempunyai peluang pekerjaan dalam tempoh masa 12 bulan.

15. Program PenjanaKerjaya yang ditadbir oleh PERKESO mempromosikan penciptaan pekerjaan di kalangan majikan, sambil meningkatkan prospek pekerjaan di kalangan bakat Malaysia.

16. Insentif pengambilan bertujuan untuk menyokong majikan dengan memberikan insentif kewangan untuk majikan yang mengupah bakat tempatan.

17. Selain daripada mendapatkan insentif, peruntukan untuk program latihan pengisian tenaga kerja atau peningkatan kemahiran juga disediakan untuk pekerja yang baru dilantik. Selain itu, insentif Mobiliti juga diberikan kepada pekerja yang harus berpindah untuk menerima pekerjaan yang ditawarkan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATO' MASIR KUJAT [SRI AMAN]

TARIKH : 27 OGOS 2020 (KHAMIS)

SOALAN

minta **MENTERI PEMBANGUNAN LUAR BANDAR** menyatakan apakah status pelaksanaan Jalan Balau - Banting di Parlimen Sri Aman.

JAWAPAN

Tuan Yang di-Pertua,

Projek Jalan dari Bukit Balau ke Banting, Sri Aman, Sarawak telah diluluskan pelaksanaanya di bawah Rolling Plan Kedua, Rancangan Malaysia Kesebelas (RP2, RMKe-11) dengan kos keseluruhan berjumlah RM56.0 juta. Skop projek ini adalah membina jalan sepanjang 9.41 km dengan spesifikasi JKR R2 dan sebuah jambatan konkrit sepanjang 90 meter menyeberangi Sungai Klauh. Status semasa bagi projek ini adalah di peringkat perolehan dan Surat Setuju Terima (SST) dijangka dikeluarkan pada bulan November 2020.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN YAMANI HAFEZ BIN MUSA
[SIPITANG]**

TARIKH : 27 OGOS 2020 (KHAMIS)

SOALAN

Minta **MENTERI PENDIDIKAN** menyatakan apakah ada cadangan membina Sekolah Menengah di Mendulong, Sipitang bagi menampung keperluan pelajar dari kawasan pedalaman termasuk Long Pasia yang paling jauh terpencil dan juga apakah status berhubung cadangan pembinaan SK Pekan Sipitang yang masih berkeadaan daif pada masa ini.

JAWAPAN

Tuan Yang di-Pertua,

Untuk makluman Ahli Yang Berhormat, keperluan pembinaan sekolah di sesuatu kawasan perlu mengambil kira kepadatan penduduk, permintaan oleh masyarakat setempat serta bilangan enrolmen murid di sekolah tadahan (*feeder school*) berhampiran. Namun begitu, kelulusan bagi pembinaan sesebuah sekolah masih juga tertakluk kepada kemampuan kewangan semasa kerajaan.

Pada masa kini, terdapat empat buah sekolah menengah di daerah Sipitang iaitu SMK Sindumin, SMK Padang Berempah, SMK Pengiran Omar dan SMK Pengiran Omar II. Kesemua sekolah ini mempunyai asrama dan mampu menampung kemasukan murid dari tujuh buah sekolah rendah dalam zon timur di bawah Pejabat Pendidikan Daerah Sipitang (PPD) Sipitang. Tujuh buah sekolah rendah ini berfungsi sebagai sekolah tadahan kepada empat sekolah menengah sedia ada.

Oleh yang demikian, tiada keperluan untuk membina sekolah menengah yang baharu buat masa ini memandangkan empat buah sekolah menengah sedia ada masih dapat menampung jumlah murid daripada tujuh buah sekolah rendah di kawasan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

DARIPADA : Y.B. TUAN FONG KUI LUN [BUKIT BINTANG]

TARIKH : 27 OGOS 2020 (KHAMIS)

SOALAN

TUAN FONG KUI LUN [BUKIT BINTANG] minta **MENTERI KEWANGAN** menyatakan adakah Kerajaan akan melanjutkan tempoh moratorium pembayaran balik pinjaman bank dan institusi kewangan yang berakhir pada September 2020 memandangkan pemulihan ekonomi negara sekarang terlalu perlahan dan kewangan rakyat masih terjejas teruk untuk membayar balik pinjaman.

JAWAPAN

Tuan Yang di-Pertua,

1. Bagi meringankan beban rakyat, membantu perniagaan dan memulihkan semula ekonomi negara berikutan penularan pandemik COVID-19, Kerajaan telah bertindak proaktif dengan melaksanakan Pakej Rangsangan Ekonomi (PRE), Pakej Rangsangan Ekonomi Prihatin Rakyat (PRIHATIN), PRIHATIN Plus dan Pelan Jana Semula Ekonomi Negara (PENJANA) bernilai RM295 bilion.
2. Di bawah pakej PRIHATIN, penangguhan pembayaran balik pinjaman (moratorium) secara automatik selama enam bulan sehingga September 2020 ditawarkan kepada peminjam individu dan perusahaan kecil dan sederhana (PKS) mendapat bantuan aliran tunai segera

terutamanya ketika pelaksanaan Perintah Kawalan Pergerakan (PKP) yang telah memberi kesan langsung kepada kegiatan ekonomi.

3. Sebagaimana yang diumumkan oleh YAB Perdana Menteri pada 29 Julai 2020, Kerajaan telah bersetuju melaksanakan moratorium lanjutan dan bantuan bank bersasar yang lebih berfokus khusus untuk golongan yang benar-benar memerlukan iaitu:

- a. Individu yang kehilangan pekerjaan pada tahun 2020 dan masih lagi belum mendapat pekerjaan lain akan ditawarkan tempoh lanjutan moratorium pinjaman sekurang-kurangnya -selama tiga bulan lagi oleh bank masing-masing; dan
- b. Individu yang masih bekerja tetapi gaji mereka terjejas akibat COVID-19 akan ditawarkan pengurangan ansuran pinjaman yang sepadan dengan pengurangan gaji mereka, bergantung kepada jenis pembiayaan. Institusi perbankan akan menawarkan tempoh fleksibiliti ini selama sekurang-kurangnya enam bulan. Institusi perbankan juga akan mempertimbangkan lanjutan pemberian fleksibiliti pada akhir tempoh tersebut, dengan mengambil kira gaji peminjam pada ketika itu.

4. Selain itu, institusi perbankan juga komited untuk memberikan fleksibiliti pembayaran balik kepada individu lain dan semua peminjam PKS yang terjejas akibat COVID-19. Fleksibiliti yang ditawarkan oleh sesebuah bank akan mengambil kira keadaan spesifik setiap peminjam. Tawaran ini termasuk:

- a. Membenarkan peminjam membayar bahagian faedah sahaja bagi sesuatu pinjaman dalam tempoh tertentu;
- b. Memanjangkan tempoh keseluruhan pinjaman bagi mengurangkan ansuran bulanan; atau

- c. Memberikan fleksibiliti lain sehingga kedudukan peminjam lebih stabil bagi menyambung pembayaran balik baki pinjaman.

Bagi pembiayaan sewa beli pula, peminjam yang terjejas akan ditawarkan jadual ansuran pembayaran yang disemak semula supaya selaras dengan Akta Sewa Beli 1967.

5. Para peminjam sudah boleh memohon secara terus dengan bank masing-masing bagi mendapatkan fleksibiliti yang dinyatakan ini, mulai 7 Ogos 2020. Pihak Bank juga secara aktif sudah mula menghubungi lebih daripada 500,000 peminjam bagi mengenalpasti peminjam yang lebih memerlukan bantuan bersasar ini.

6. Dengan pembukaan ekonomi secara berperingkat sejak Mei 2020, pelaksanaan bantuan bank bersasar bermula 1 Oktober 2020 ini adalah wajar bagi mereka yang masih terjejas. Malah, jumlah peminjam individu dan PKS yang telah mula membuat bayaran ansuran pinjaman meningkat daripada 336,000 peminjam pada April 2020 kepada 619,000 peminjam pada Julai 2020. Inisiatif ini juga adalah bagi menjamin sistem perbankan negara kekal utuh dan kukuh.

7. BNM akan memantau kemajuan pelaksanaan inisiatif yang dijalankan oleh institusi perbankan bagi membantu peminjam yang masih menghadapi kesulitan kewangan sementara. BNM juga akan terus menumpukan usaha bagi memastikan sistem perbankan terus menjalankan fungsi perantaraannya dengan berkesan dalam menyokong pemulihan ekonomi.

Sekian, terima kasih.

**MESYUARAT KEDUA, PENGGAL KETIGA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

**DARIPADA : TUAN LUKANISMAN BIN AWANG
SAUNI [SIBUTI]**

TARIKH : 27.8.2020 (KHAMIS)

SOALAN

minta **MENTERI PEMBANGUNAN LUAR BANDAR** menyatakan apakah status Projek Lampu Jalan Kampung (LJK) tahun 2019 dan peruntukan LJK 2020 bagi Parlimen Sibuti.

JAWAPAN

Tuan Yang di-Pertua,

Bagi Program Pemasangan Lampu Jalan Kampung (LJK) di Parlimen Sibuti untuk tahun 2019, sebanyak 95 unit LJK telah dipasang, dengan pecahan 47 unit lampu *high pressure sodium vapour* (HPSV) manakala 48 unit lagi lampu jenis *light emitting diode* (LED), melibatkan peruntukan sebanyak RM255,010.00.

Bagi pelaksanaan tahun 2020 di Negeri Sarawak, sebanyak 160 unit lampu jenis HPSV dan 40 unit lampu jenis LED, melibatkan peruntukan sebanyak RM232,800.00 telah diperuntukkan untuk pemasangan di setiap Parlimen luar dan pinggir bandar di negeri tersebut. Walau bagaimanapun, LJK yang dipasang adalah berdasarkan senarai kampung yang diterima daripada Kementerian Utiliti Sarawak (KUS) mengikut keperluan, yang mana kerja-kerja pemasangan dijalankan oleh Sarawak Energy Berhad (SEB), serta dioperasi dan disenggara secara berterusan oleh pihak berkuasa elektrik negeri (PBEN) tersebut.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 27 OGOS 2020 (KHAMIS)

SOALAN

Minta **MENTERI PENDIDIKAN** menyatakan apakah status pembaikan semua sekolah-sekolah daif di Sarawak sebab-sebab tertangguhnya sesetengah projek selepas bayaran RM350 juta untuk fasa pertama “*contra-loan*” yang dipersetujui antara Kerajaan negeri dan Kerajaan Pusat.

JAWAPAN

Tuan Yang di-Pertua,

Untuk makluman Ahli Yang Berhormat, pelaksanaan projek baik pulih bangunan daif di sekolah bagi negeri Sarawak yang dibiayai melalui peruntukan RM1 bilion, iaitu kontra bayaran balik pinjaman adalah mengikut mekanisme khusus. Mekanisme tersebut telah dipersetujui secara bersama oleh Kementerian Pendidikan Malaysia (KPM) dan Kerajaan Negeri Sarawak. Sehingga Julai 2020, sejumlah RM700 juta pinjaman telah dibayar balik oleh Kerajaan Negeri Sarawak.

Pelaksanaan projek baik pulih bangunan daif ini merangkumi pelbagai skop seperti pembinaan bilik darjah, blok pentadbiran, asrama, rumah guru, kuarters, dewan makan, pusat sumber, bilik sains, tandas dan kemudahan yang lain. Secara keseluruhannya, projek baik pulih bangunan daif di sekolah dengan dana RM1 bilion ini dilaksanakan melalui 3 fasa.

1. Fasa 1 melibatkan 41 buah sekolah dengan kos projek berjumlah RM350 juta;
2. Fasa 2 melibatkan 52 buah sekolah dengan kos projek berjumlah RM350 juta; dan
3. Fasa 3 sedang dimuktamadkan senarai dan skop projek oleh KPM bersama-sama Kerajaan Negeri Sarawak melibatkan kos projek sebanyak RM300 juta.

Sehingga 25 Ogos 2020, kerajaan telah meluluskan 93 projek bagi Fasa 1 dan Fasa 2 dengan kos RM700 juta. Bagi status pelaksanaan projek Fasa 1, sebanyak 21 projek berada di fasa pembinaan dan 20 projek lagi berada di fasa prabina. Perincian status pelaksanaan bagi projek fasa prabina meliputi 5 projek dalam proses pengeluaran Surat Setuju Terima, 9 projek dalam proses penilaian tender dan 6 projek dijangka akan ditender pada akhir bulan September 2020.

Bagi status pelaksanaan projek Fasa 2 pula, semua projek berada di dalam fasa pra bina. Pihak JKR Sarawak sedang dalam pelaksanaan kerja ukur dan penyediaan dokumen tender. Projek ini dijangka akan ditender secara berperingkat mulai 29 Ogos 2020.

Antara faktor yang menyumbang kepada kelewatan dalam pelaksanaan projek setelah selepas bayaran RM350 juta untuk Fasa 1 diterima adalah seperti yang berikut:

1. KPM hanya menerima kelulusan peruntukan daripada Kementerian Kewangan pada 5 Ogos 2019;
2. Pelbagai peringkat perbincangan perlu diadakan di antara KPM dengan Kerajaan Negeri Sarawak dalam memilih sekolah dan menentukan skop kerja;
3. Proses kerja-kerja awalan yang mengambil masa terutama kerja-kerja ukur dan penyiasatan tanah atau *Soil Investigation* (SI);
4. Tempoh pelaksanaan projek mengambil masa 6 hingga 18 bulan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DR. NIK MUHAMMAD ZAWAWI BIN HAJI
SALLEH [PASIR PUTEH]**

TARIKH : 27 OGOS 2020 (KHAMIS)

SOALAN

Minta **MENTERI PERTANIAN DAN INDUSTRI MAKANAN** menyatakan sambutan permohonan Geran Agropreneur Muda dalam kalangan anak muda dan usaha yang dilakukan bagi meningkatkan penglibatan anak-anak muda.

JAWAPAN

Tuan Yang Dipertua,

Sambutan terhadap Program Agropreneur Muda adalah sangat memberangsangkan terutama bagi permohonan bantuan Geran Agropreneur Muda. Secara umumnya, program ini menawarkan perkhidmatan dan bantuan seperti berikut:

- i. Menyediakan Geran Agropreneur Muda (GAM) berbentuk barangan sehingga RM20,000 bagi setiap projek;
- ii. Menyediakan bantuan modal melalui Pakej Pembiayaan Khas Agrobank dan TEKUN Nasional sehingga RM200,000 bagi projek pengembangan; dan
- iii. Menyediakan kursus jangka pendek dan khidmat nasihat teknikal dan kewangan melalui jabatan/agensi berkaitan di bawah Kementerian.

Sejak Geran Agropreneur Muda diperkenalkan dari tahun 2016 sehingga Jun 2020, seramai **6,005 orang peserta** agropreneur muda dari seluruh negara telah berjaya mendapat kelulusan Geran Agropreneur Muda melibatkan peruntukan **RM104 juta**.

Kementerian Pertanian dan Industri Makanan (MAFI) melalui Unit Agropreneur Muda (UAM) sentiasa menambah baik pelaksanaan inisiatif dan aktiviti dalam meningkatkan penglibatan anak-anak muda dalam sektor agromakanan. Antaranya:

i. Perluasan skop Program Agropreneur Muda

Kementerian meluaskan skop program melibatkan bidang tanaman yang merangkumi penggunaan agroteknologi, sistem fertigasi, tanaman hidroponik dan akuaponik bagi memberi lebih banyak peluang untuk golongan belia memohon.

ii. Jelajah Agropreneur Muda

Kementerian mengadakan aktiviti Jelajah Agropreneur Muda di seluruh negara bagi memperkenalkan kepada golongan belia berhubung Program Agropreneur Muda yang menawarkan bantuan Geran Agropreneur Muda, pembiayaan mudah, kursus teknikal dan khidmat nasihat.

iii. Program *Livestreaming* dan Latihan Webinar

Kementerian secara aktif menganjurkan kursus-kursus secara webinar, sesi perkongsian dan taklimat program melalui media sosial untuk menarik lebih ramai belia secara santai dan lebih berkonsep terbuka kepada semua.

iv. Sesi *Engagement* Merentas Kementerian

Kementerian juga mempergiat usaha untuk melibatkan lebih ramai belia dengan mengadakan sesi pertemuan dan perbincangan bersama Kementerian Belia dan Sukan (KBS), Kementerian Pengajian tinggi (KPT) dan Kementerian Pembangunan Usahawan dan Koperasi (MEDAC) untuk menjalinkan usaha sama yang dapat dirangka untuk keutamaan belia.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATUK MOHD. AZIS BIN JAMMAN [SEPANGGAR]

TARIKH : 27 OGOS 2020 (KHAMIS)

SOALAN

minta **MENTERI PEMBANGUNAN LUAR BANDAR** menyatakan apakah langkah-langkah yang akan dilakukan bagi menyelesaikan masalah bekalan air bersih di Sabah yang setiap tahun mengalami masalah yang sama.

JAWAPAN

Tuan Yang di-Pertua,

Secara dasarnya, penyediaan bekalan air bersih dan terawat adalah di bawah tanggungjawab Kerajaan Negeri dan Pihak Berkuasa Air Negeri (PBAN) yang melibatkan penyediaan sumber air, pembinaan paip utama, pembinaan loji rawatan air serta pengoperasian dan penyelenggaraan.

Peranan dan matlamat Kementerian Pembangunan Luar Bandar (KPLB) adalah membantu mempercepatkan liputan dan merapatkan jurang bekalan air bersih dan terawat ke kawasan luar bandar melalui penyambungan paip retikulasi dari paip utama ke rumah-rumah yang belum mendapat bekalan air bersih dan terawat.

Bagi kawasan-kawasan luar bandar yang kritikal, Kementerian boleh mempertimbangkan membina atau menaiktaraf loji rawatan air, pembinaan paip utama, pembinaan tangki dan rumah pam bagi

NO. SOALAN : 20

memastikan kawasan luar bandar mendapat bekalan air terawat dengan tekanan dan kapasiti yang mencukupi.

Langkah-langkah yang diambil oleh Kementerian adalah dengan sentiasa melibatkan Agensi Kerajaan Negeri seperti UPEN Sabah, Kementerian Pembangunan Infrastruktur (KPI) Sabah, Kementerian Pembangunan Luar Bandar (KPLB) Sabah dan Jabatan Air Negeri Sabah (JANS) dalam semua perbincangan, penyelarasan dan semak silang sebelum sesuatu projek dan permohonan belanjawan dilaksanakan. Kementerian juga telah mewujudkan Jawatankuasa Bersama di antara Kerajaan Negeri dan Kementerian bagi memastikan pelaksanaan projek lebih efisien.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

DARIPADA : Y.B. TUAN SIM TZE TZIN [BAYAN BARU]

TARIKH : 27 OGOS 2020 (KHAMIS)

SOALAN

TUAN SIM TZE TZIN [BAYAN BARU] minta **MENTERI KEWANGAN** menyatakan adakah Kerajaan akan mengkaji keberkesanan GST dan SST. Pada pendapat Menteri Kewangan sebagai pakar korporat dan ekonomi apakah yang lebih sesuai untuk negara.

JAWAPAN

Tuan Yang Di-Pertua,

Seperti mana Ahli Yang Berhormat sedia maklum, *Goods and Services Tax* (GST) merupakan sistem percukaian yang mesra perniagaan, berupaya menjana hasil yang lebih stabil, meningkatkan pematuhan cukai serta berupaya membendung aktiviti *black economy*.

Kerajaan terdahulu telah menggantikan sistem GST kepada cukai jualan dan cukai perkhidmatan mulai 1 September 2018 selaras dengan manifesto Kerajaan terdahulu untuk menghapuskan GST sebagai langkah mengurangkan kos sara hidup rakyat.

Kerajaan sedang menilai keberkesanan pelaksanaan sistem cukai jualan dan cukai perkhidmatan. Pada masa yang sama, Kerajaan juga telah memulakan kajian kesesuaian bagi pelaksanaan satu bentuk cukai kepenggunaan yang lebih efisien berbanding cukai jualan dan cukai perkhidmatan meliputi kesan ke atas ekonomi, harga barang serta beban cukai ke atas pengguna supaya apa-apa model cukai kepenggunaan, jika dilaksanakan kelak perlulah lebih efisien dan efektif daripada model GST 2014 dan cukai jualan dan cukai perkhidmatan terdahulu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 27 OGOS 2020 (KHAMIS)

SOALAN

Minta **MENTERI PENDIDIKAN** menyatakan apakah langkah-langkah yang diambil oleh Kementerian untuk membantu para pelajar agar sesi pembelajaran di rumah melalui platform dalam talian, terutamanya mereka yang tidak memiliki komputer atau komputer riba di rumah.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk memastikan semua murid tidak ketinggalan dan dapat mengikuti pembelajaran secara berterusan dalam keadaan selamat sepanjang tempoh Perintah Kawalan Pergerakan (PKP). KPM berusaha menyediakan akses pembelajaran kepada murid melalui kaedah *Home-based Learning* mengikut kesesuaian guru dan murid. Kaedah *Home-based Learning* ini dilaksanakan melalui pelantar pembelajaran digital iaitu MOE-DL, yang kemudiannya dikenali sebagai Digital Education Learning Initiative Malaysia (DELIMa).

Untuk makluman Ahli Yang Berhormat, KPM telah menjalankan Kajian Kesediaan Murid dalam Pembelajaran Secara dalam Talian (*Online Learning*) pada 28 Mac hingga 2 April 2020 dengan melibatkan 670,118 responden yang terdiri daripada ibu bapa kepada 893,331 murid. Dapatan kajian menunjukkan 6.0 peratus murid memiliki komputer peribadi, 9.3 peratus murid memiliki komputer riba, 5.8 peratus murid memiliki tablet dan 46.5 peratus murid memiliki telefon pintar.

Terdapat juga murid yang memiliki lebih daripada satu peranti bagi kegunaan pembelajaran secara dalam talian. Namun, dalam masa yang sama, masih terdapat 36.9 peratus murid tidak mempunyai sebarang peranti bagi membolehkan mereka mengikuti pembelajaran secara dalam talian.

Dapatan ini menunjukkan bahawa sebahagian besar murid tidak dapat mengikuti pembelajaran secara dalam talian dengan berkesan kerana tidak memiliki peranti yang bersesuaian. Di samping itu, terdapat juga kekangan dalam akses kepada internet. Keadaan ini menyebabkan pembelajaran tidak dapat berlaku secara menyeluruh dan seragam kepada semua murid. Walau bagaimanapun, apabila semua sekolah telah dibuka sepenuhnya pada 3 Ogos 2020, semua murid telah dapat mengikuti pengajaran dan pembelajaran secara bersemuka.

KPM prihatin dan sentiasa berusaha untuk memastikan semua murid mendapat akses pembelajaran secara seragam. Bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, kaedah *Home-based Learning* turut dilaksanakan melalui siaran TV Pendidikan, rancangan radio pendidikan dan serahan bahan pembelajaran kepada murid.

Secara keseluruhan, KPM menyedari bahawa terdapat kelemahan dalam pelaksanaan *Home-Based Learning* semasa PKP yang menyebabkan keberkesanan pengajaran dan pembelajaran secara dalam talian agak terhad berbanding kaedah secara bersemuka. Ini adalah kerana pengajaran dan pembelajaran secara dalam talian merupakan sesuatu yang baharu untuk kebanyakan guru, murid dan ibu bapa.

Oleh demikian, antara perkara utama yang dilaksanakan setelah sekolah dibuka semula ialah guru menilai tahap penguasaan murid. Seterusnya, guru mengambil tindakan sewajarnya bagi memastikan murid sekurang-kurangnya mencapai tahap penguasaan minimum dalam setiap mata pelajaran yang diikuti. KPM akan sentiasa berusaha untuk meningkatkan lagi keberkesanan kaedah *Home-based Learning* ini dari semasa ke semasa. Buat masa ini, KPM sedang merangka strategi pelaksanaan yang komprehensif dalam memperkasa pendidikan digital, termasuk pelaksanaan *Home-based Learning*. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB DATUK LIEW VUI KEONG [BATU SAPI]

TARIKH : 27 OGOS 2020 (KHAMIS)

SOALAN

YB DATUK LIEW VUI KEONG [BATU SAPI] minta **PERDANA MENTERI** menyatakan adakah Kerajaan akan teruskan usaha memansuhkan hukuman mati mandatori di Malaysia.

**JAWAPAN [YB DATO' TAKIYUDDIN BIN HASSAN, MENTERI DI
JABATAN PERDANA MENTERI (PARLIMEN DAN
UNDANG-UNDANG)]**

Tuan Yang di-Pertua,

Pada 29 Ogos 2019, Kerajaan telah menyatakan komitmen untuk memansuhkan hukuman mati mandatori melalui Kajian Hukuman Gantian Terhadap Hukuman Mati Mandatori oleh suatu Jawatankuasa Khas yang dilantik. Keputusan ini adalah susulan keputusan Jemaah Menteri terdahulu yang mendapati terdapat keperluan supaya kajian yang lebih mendalam dibuat terhadap keputusan untuk memansuhkan hukuman mati mandatori. Ini termasuklah kajian berkaitan polisi penghukuman (*sentencing policy*) bagi menggantikan hukuman mandatori dengan hukuman yang lebih wajar, tertakluk kepada budi bicara Mahkamah.

Susulan keputusan tersebut, kajian hukuman gantian terhadap hukuman mati mandatori telah dilaksanakan Jawatankuasa Khas dalam tempoh 4 bulan bermula 20 September 2019 hingga 31 Januari 2020, hasil sesi libat urus yang komprehensif dan menyeluruh dengan semua pihak berkepentingan termasuk masyarakat umum. Selain daripada cadangan hukuman alternatif terhadap hukuman mati mandatori, Jawatankuasa Khas turut mengemukakan syor-syor penambahbaikan terhadap sistem keadilan di Malaysia. Laporan kajian tersebut akan dibentangkan dalam Mesyuarat Jemaah Menteri untuk pertimbangan dan persetujuan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN
DARIPADA : Y.B. TUAN LIM GUAN ENG [BAGAN]
TARIKH : 27 OGOS 2020 (KHAMIS)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan sama ada Belanjawan 2020 yang dibentangkan oleh Kerajaan PH akan diteruskan dan sekiranya tidak nyatakan secara terperinci butiran projek pembangunan dan program termasuk nilainya, yang akan dibatalkan atau ditangguhkan serta rasionalnya.

JAWAPAN

Tuan Yang di-Pertua,

Untuk makluman Yang Berhormat, susulan penularan wabak COVID-19 dan ketidaktentuan ekonomi global dan harga komoditi yang melanda dunia pada ketika ini, Kerajaan terpaksa mengkaji semula kedudukan fiskalnya termasuk inisiatif yang telah diumumkan dalam Belanjawan 2020. Sehubungan itu, beberapa inisiatif yang diumumkan dalam Belanjawan 2020 didapati tidak lagi menjadi keutamaan untuk dilaksanakan dan perlu dikaji semula.

Di samping itu, peruntukan sedia ada diutamakan untuk menampung ruang fiskal serta melaksanakan inisiatif-inisiatif yang telah diumumkan dalam Pakej Rangsangan Ekonomi Perihatin Rakyat (PRIHATIN) dan Pelan Jana Semula Ekonomi Negara (PENJANA). Kerajaan akan meneliti semula keperluan untuk melaksanakan projek-projek ini pada masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS (2020)**

PERTANYAAN : LISAN

**DARIPADA : YB DATUK SERI HAJI AHMAD BIN MASLAN
[PONTIAN]**

TARIKH : 27 OGOS 2020 (KHAMIS)

SOALAN

DATUK SERI HAJI AHMAD BIN MASLAN [PONTIAN] minta **PERDANA MENTERI** menyatakan adakah akan diwujudkan Suruhanjaya Siasatan DiRaja tentang 4 perkara iaitu 1MDB, Tabung Haji, FELDA dan MARA. Adakah Kerajaan bercadang untuk membentang RUU mengenai dana/derma politik dan RUU mengenai perlu dibatalkan kemenangan mana-mana parti politik jika manifesto pilihan raya tidak dipenuhi dalam masa yang tertentu selepas sesuatu PRU.

**JAWAPAN: [YB DATO' TAKIYUDDIN BIN HASSAN, MENTERI DI
JABATAN PERDANA MENTERI (PARLIMEN DAN
UNDANG-UNDANG)]**

Sebagaimana Ahli Yang Berhormat sedia maklum, Kerajaan sentiasa terbuka dalam menerima pandangan dan cadangan penambahbaikan sesuatu perkara yang dibangkitkan oleh pelbagai pihak. Buat masa ini, sekiranya perlu cadangan penubuhan Suruhanjaya Siasatan Diraja tersebut akan diteliti oleh Kerajaan.

Manakala berkenaan dengan isu dana/ derma politik pula, Kerajaan sentiasa komited dalam mengawal selia sumbangan politik dan bagi tujuan tersebut, dasar sumbangan politik dalam format rang undang-undang telah dikemukakan kepada Jawatankuasa Pilihan Khas Menimbang Rang Undang-Undang Parlimen (PSC) pada 7 November 2019.

Setakat ini, maklum balas yang diterima adalah daripada sesi libat urus bersama beberapa parti politik serta sesi taklimat bersama mantan YAB Perdana Menteri Ke-7 pada 8 April 2019. Kerajaan berpendapat bahawa terdapat ruang untuk penambahbaikan dibuat kepada dasar tersebut. Bagi tujuan penambahbaikan tersebut, Kerajaan telahpun mengarahkan Pusat Governans, Integriti dan Anti-Rasuah Nasional (GIACC) untuk membantu PSC mengadakan kajian lanjut dan sesi *townhall* dengan semua pemegang taruh dan mengemukakan laporan penambahbaikan kepada dasar tersebut kepada Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB. TUAN LIM KIT SIANG
[ISKANDAR PUTERI]**

TARIKH : 27 OGOS 2020 (KHAMIS)

SOALAN

YB. TUAN LIM KIT SIANG [ISKANDAR PUTERI] minta **PERDANA MENTERI** menyatakan sama ada Kerajaan masih komited membawa mereka yang bertanggungjawab menyebabkan negara kita kehilangan berbilion ringgit akibat skandal 1MDB ke muka keadilan berserta dengan langkah-langkah yang diambil untuk mencapai matlamat ini.

**JAWAPAN [YB DATO' TAKIYUDDIN BIN HASSAN, MENTERI DI
JABATAN PERDANA MENTERI (PARLIMEN DAN
UNDANG-UNDANG)]**

Jabatan Peguam Negara komited untuk mendakwa mana-mana orang yang melakukan apa-apa kesalahan jenayah tanpa mengambil kira bangsa, kedudukan, keturunan dan fahaman politik orang itu. Setakat ini, sebanyak tiga puluh empat kes yang berhubungan dengan kes 1MDB dan kes SRC International telah didakwa di Mahkamah. Daripada tiga puluh empat kes tersebut, tiga puluh dua kes masih dalam perbicaraan di Mahkamah.

Apa-apa wang dan aset berhubung dengan kes ini yang telah dan akan dirampas dan dikembalikan kepada Kerajaan akan dikreditkan ke dalam Akaun Amanah Pemulihan Aset 1MDB.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE TIGA,
PARLIMEN EMPATBELAS**

PERTANYAAN : JAWAB LISAN

DARIPADA : YB TUAN PANG HOK LIONG (LABIS)

TARIKH : 27 OGOS 2020 (KHAMIS)

SOALAN

TUAN PANG HOK LIONG [LABIS] minta **MENTERI DALAM NEGERI** menyatakan :-

(a) apakah langkah berkesan telah diambil untuk menghalang pengganas menjadikan Malaysia sebagai pusat transit dan perincian jumlah tahanan telah dibuat oleh pihak berkuasa dan negara asalnya setakat 31 Mei 2020. ; dan

(b) bilakah Kerajaan akan mengkaji semula free visa travel agreements dengan negara Timur Tengah dan Afrika atau dasar keperluan visa imigresen memandangkan ramai pengganas masuk Malaysia dari negara Timur Tengah dan Afrika yang tidak memerlukan visa.

JAWAPAN

Tuan Yang Di Pertua,

Kerajaan tidak menolak kemungkinan ancaman pengganas di luar negara akan menular ke negara kita termasuk dijadikan sebagai transit oleh mereka yang pernah berada di kawasan konflik Iraq dan Syria.

Sehubungan itu, antara langkah yang diambil dalam usaha meningkatkan

lagi tahap keselamatan negara adalah dengan memperkukuh kawalan keselamatan di lokasi-lokasi strategik negara seperti pusat-pusat tumpuan pelancong, pusat-pusat perniagaan komersial, kepentingan negara asing dan sasaran-sasaran penting di seluruh negara. Kawalan keselamatan ini dilaksanakan dengan kerjasama strategik antara agensi-agensi keselamatan negara terutamanya oleh pihak Polis Diraja Malaysia (PDRM) dan Angkatan Tentera Malaysia (ATM).

Pada masa yang sama, kawalan keselamatan di semua pintu masuk utama negara sama ada udara, darat mahupun laut turut dipertingkatkan termasuklah kawalan di sepanjang sempadan negara. Kementerian dari semasa ke semasa terus meningkatkan penguatkuasaan berdasarkan undang-undang yang sedang berkuatkuasa seperti Akta Pencegahan Keganasan 2015, Akta Kesalahan Keselamatan (Langkah-Langkah Khas) 2012 dan Akta Pencegahan Jenayah 1959. Selain itu, kerjasama antara pihak PDRM dengan Suruhanjaya Komunikasi dan Multimedia Malaysia (SKMM) telah dipertingkatkan bagi memantau media-media sosial agar perkembangan pengaruh Daesh dapat dikekang.

Tuan Yang Di Pertua,

Visa merupakan salah satu mekanisme yang dikenakan kepada warganegara asing bagi tujuan kawalan kemasukan ke Malaysia sepertimana peruntukan Seksyen 2(1) Akta Pasport 1966.

Ketetapan syarat dan dasar bagi keperluan atau pengecualian visa kepada mana-mana warganegara asing adalah tertakluk kepada penilaian keselamatan dan persetujuan melalui Perjanjian Bersama Penghapusan Visa (Separa) antara Malaysia dengan negara-negara yang berkaitan. Justeru, sebarang cadangan untuk mengkaji semula keperluan visa untuk mana-mana negara perlu diteliti dan dipertimbangkan dengan terperinci.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS TAHUN 2020**

PERTANYAAN : LISAN

**DARIPADA : DATO' SERI HAJI ABDUL HADI BIN AWANG
[MARANG]**

TARIKH : 27 OGOS 2020 (KHAMIS)

SOALAN

DATO' SERI HAJI ABDUL HADI BIN AWANG [MARANG] minta **MENTERI PERTANIAN DAN INDUSTRI MAKANAN** menyatakan apakah langkah terkini Kementerian untuk memastikan keselamatan makanan (*food security*) terjamin khususnya dalam menghadapi situasi luar jangka pada masa hadapan seperti wabak COVID-19.

JAWAPAN

Tuan Yang Dipertua,

Kementerian Pertanian dan Industri Makanan (MAFI) berperanan dalam memastikan bekalan makanan negara mencukupi dan terjamin dalam apa jua keadaan. Dalam hal ini, Kementerian akan terus menggiatkan usaha bagi meningkatkan tahap pengeluaran makanan negara dan memantapkan rantai bekalan makanan sebagai langkah persediaan menghadapi situasi luar jangka seperti wabak COVID-19.

Sehubungan itu, langkah terkini Kementerian bagi memastikan keselamatan makanan (*food security*) terjamin adalah seperti berikut:

SOALAN NO : 28

1. Merencanakan aktiviti pengeluaran makanan dengan pemberian subsidi / insentif input seperti benih, baja dan racun serta penyediaan khidmat nasihat teknikal;
2. Meningkatkan keberkesanan pengeluaran dengan menambahbaik infrastruktur dan kemudahan seperti jalan dan fasiliti ladang, pengaliran dan saliran kawasan sawah padi serta kompleks dan jeti pendaratan ikan;
3. Meningkatkan kecekapan rantai bekalan dan logistik melalui kemudahan pusat pengumpulan, penyimpanan, pemprosesan dan pengedaran;
4. Memperluas akses pasaran pengusaha tani melalui outlet pemasaran seperti pasar tani, pasar nelayan, Agrobazaar dan MyFarmOutlet serta menggalakkan penyertaan usahawan dalam platform e-dagang seperti Agrobazaar Online, NEKMATBIZ dan platform kerjasama strategik dengan pihak swasta seperti Lazada dan Shopee;
5. Melahirkan tenaga kerja yang kompeten dan berdaya saing melalui Program Latihan Kemahiran Pertanian Kebangsaan;
6. Meremajakan sektor pertanian dengan menggalakkan penyertaan golongan muda melalui Program Agropreneur Muda dengan geran *in-kind* dan skim pembiayaan serta latihan teknikal;
7. Menggalakkan aplikasi teknologi moden seperti fertigasi, kilang tanaman, penggunaan dron, sistem pertanian pintar, *artificial intelligence* (AI), *big data* dan *internet of things* (IoT);
8. Melaksanakan aktiviti penyelidikan dan pembangunan (R&D) berkaitan input pertanian seperti benih dan baka yang mempunyai daya tahan dan kerintangan yang tinggi kepada cuaca melampau dan racun perosak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN
DARIPADA : Y.B. TUAN SYED SADDIQ
BIN SYED ABDUL RAHMAN [MUAR]
TARIKH : 27 OGOS 2020 (KHAMIS)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI KEWANGAN** menyatakan inisiatif Malaysia@Work berjumlah RM6.5 bilion yang telah dibentang Kerajaan pada Belanjawan 2020 akan diteruskan seperti yang telah dirancang terutamanya kepada golongan belia.

JAWAPAN

Tuan Yang di-Pertua,

Program Malaysia@Work yang telah diumumkan dalam Belanjawan 2020 terpaksa ditangguhkan ekoran penularan wabak COVID-19.

Wabak COVID-19 telah mengakibatkan kemelesatan ekonomi dunia dan kadar pengangguran tertinggi. Malaysia tidak terkecuali dan telah turut mengalami pertumbuhan ekonomi negatif bagi suku kedua tahun 2020.

Kerajaan Perikatan Nasional telah mengambil langkah proaktif menangani impak kepada rakyat dan ekonomi dengan merangka pakej rangsangan PRIHATIN dan PENJANA. Langkah PRIHATIN dan PENJANA melibatkan suntikan ekonomi sebanyak RM260 bilion yang melibatkan perbelanjaan fiskal tambahan sebanyak RM45 bilion.

Perbelanjaan tambahan ini tertumpu kepada meringankan beban rakyat, khususnya melalui Bantuan Prihatin Nasional (BPN) yang memanfaatkan lebih 10 juta rakyat dengan perbelanjaan melebihi RM11 bilion. Memandangkan risiko kehilangan pekerjaan, Program Subsidi Upah juga telah diperkenalkan dengan peruntukan melebihi RM15 bilion. Setakat ini (7 Ogos), RM9 bilion telah dibelanjakan yang membantu mengekalkan 2.6 juta pekerjaan.

Selaras dengan keutamaan pada masa ini, Kerajaan terpaksa mengambil langkah untuk mengkaji semula dan menangguh beberapa program Belanjawan 2020, seperti Malaysia@Work.

Saya percaya Yang Berhormat bersetuju dengan langkah ini supaya dilaksanakan dan program BPN dan Subsidi Upah diberi keutamaan. Namun demikian, selain daripada mengekalkan pekerjaan melalui Program Subsidi Upah, program PENJANA juga memberi tumpuan kepada objektif menggalakkan majikan mewujudkan pekerjaan baharu bagi rakyat Malaysia yang menganggur. Sehubungan itu, Kerajaan telah menyediakan peruntukan RM2 bilion bagi program peningkatan kemahiran (dengan izin *'reskilling & upskilling'*) bagi menyesuaikan modal insan kepada keperluan pekerjaan.

Selain itu, RM1.5 bilion disediakan bagi program insentif pengambilan pekerja yang mengandungi beberapa elemen program "Malaysia@Work", khususnya dalam memberi insentif kepada majikan secara bulanan di antara RM600 hingga RM1,000 sebulan untuk menggaji rakyat Malaysia yang menganggur. Seperti di bawah "Malaysia@Work", satu kategori khusus disediakan untuk menggalakkan penggajian perantisan (atau dengan izin *"apprentice"*) daripada golongan lepasan sekolah atau graduan baharu. Satu penambahbaikan berbanding dengan "Malaysia@Work" adalah bantuan insentif tersebut diberi secara langsung kepada majikan dan tidak melalui sumbangan kepada KWSP.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB PUAN NOR AZRINA BINTI SURIP
[MERBOK]**

TARIKH : 27 OGOS 2020 (KHAMIS)

SOALAN

PUAN NOR AZRINA BINTI SURIP [MERBOK] minta **PERDANA MENTERI** menyatakan Sejauh mana Kerajaan akan melaksanakan cadangan Jawatankuasa Khas Pembaikan Sistem dan Undang-undang Pilihan Raya (ERC) untuk menggantikan sistem (First-Past-The-Post-FPTP) dengan sistem Perwakilan berkadar (Proportional Representation).

JAWAPAN : [YB DATO' TAKIYUDDIN BIN HASSAN, MENTERI DI JABATAN PERDANA MENTERI (PARLIMEN DAN UNDANG-UNDANG)]

Untuk makluman Ahli Yang Berhormat, Kerajaan sentiasa terbuka untuk menerima cadangan-cadangan penambahbaikan daripada pelbagai pihak termasuklah cadangan untuk menukar sistem pilihan raya daripada *First Past The Post* kepada *Proportional Representation*.

Suruhanjaya Pilihan Raya (SPR) dan Jawatankuasa Pembaikan Sistem dan Undang-Undang Pilihan Raya Malaysia (*Electoral Reform Committee* - ERC), Jabatan Perdana Menteri **sedang meneliti sistem pilihan raya** sedia ada dan mengkaji kesesuaian sistem-sistem pilihan raya yang lain termasuklah cadangan sistem *Proportional Representation*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS
TAHUN 2020**

PERTANYAAN : LISAN

**DARIPADA : YB PUAN TERESA KOK SUH SIM
[SEPUTEH]**

TARIKH : 27 OGOS 2020 (KHAMIS)

SOALAN

PUAN TERESA KOK SUH SIM [SEPUTEH] minta **MENTERI SUMBER MANUSIA** menyatakan apakah Kerajaan telah menjalankan kajian terhadap sektor perladangan sawit, getah, pertanian dan perkilangan berikutan dasar penggantungan pengambilan pekerja asing ke Malaysia. Apakah Kementerian akan menjalankan pemutihan terhadap pekerja asing haram di negara kita demi memenuhi keperluan tenaga kerja di sektor perladangan, pertanian dan perkilangan.

JAWAPAN

Tuan Yang di-Pertua,

1. Sepertimana Yang Berhormat sedia maklum, Kerajaan telah membekukan pengambilan pekerja asing baharu mengambil kira penularan wabak pandemik COVID-19. Kerajaan telah mengambil pendekatan “*all out*” bagi memastikan pencari kerja warganegara diserapkan dalam pasaran pekerjaan bagi mengurangkan kadar pengangguran.

2. Berhubung dengan isu pekerja asing sedia ada dalam negara yang terkesan akibat pandemik ini dan bagi membantu industri yang memerlukan tenaga kerja, Kerajaan bermula 10 Jun 2020 telah menjalankan program pertukaran majikan bagi membolehkan majikan yang tidak dapat meneruskan penggajian pekerja asing mereka supaya menyerahkan pekerja-pekerja tersebut kepada majikan baharu. Proses ini dikendalikan sepenuhnya oleh Jabatan Tenaga Kerja Semenanjung Malaysia dan Kementerian Dalam Negeri untuk sektor yang sama. Pada masa yang sama, Kerajaan juga sedang meneliti pelbagai aspek dalam menambah baik pengurusan pengambilan pekerja asing secara holistik.

3. Berhubung dengan kajian keperluan guna tenaga dalam sub sektor perladangan sawit, getah, pertanian dan perkilangan, adalah disarankan supaya Kementerian Kawal Selia seperti Kementerian Perusahaan Perladangan dan Komoditi serta Kementerian Perdagangan Antarabangsa dan Industri untuk mengadakan sesi libat urus dan proses naziran bagi memastikan keperluan tenaga kerja yang dibangkitkan oleh pihak industri adalah *genuine* dan berasas sebelum hala tuju berhubung aspek keperluan dipertimbangkan oleh Kerajaan.

4. Berkaitan dengan cadangan pemutihan pekerja asing tidak berdokumen, perkara ini adalah dibawah bidang kuasa Kementerian Dalam Negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 27 OGOS 2020 (KHAMIS)

SOALAN

TUAN CHARLES ANTHONY SANTIAGO [KLANG] minta **PERDANA MENTERI** menyatakan status pengangguran dalam negara dengan pecahan jantina, sektor formal dan tidak formal, pekerja asing dan pekerja tempatan dan kumpulan umur (*age-group*).

JAWAPAN

Tuan Yang di-Pertua,

1. Untuk makluman Ahli Yang Berhormat, berdasarkan Survei Tenaga Buruh (STB), kadar pengangguran di Malaysia pada Mei 2020 adalah 5.3 peratus dengan bilangan penganggur sebanyak 826.1 ribu orang. Kadar pengangguran mengikut jantina menunjukkan kadar pengangguran lelaki adalah pada 5.2 peratus dengan bilangan sebanyak 499.8 ribu orang. Sementara itu, kadar pengangguran perempuan adalah 5.3 peratus dengan bilangan penganggur seramai 326.3 ribu orang.
2. Daripada keseluruhan bilangan penganggur pada Mei 2020, Warganegara merangkumi 83.0 peratus, manakala selebihnya adalah Bukan Warganegara dengan sumbangan peratusan sebanyak 17.0 peratus.
3. Dari segi kumpulan umur, kadar pengangguran bagi kumpulan umur 25 tahun dan ke atas atau umur dewasa adalah pada 3.5 peratus. Sementara itu, kadar pengangguran belia dalam kumpulan umur 15 hingga 30 tahun ialah 10.0 peratus pada Mei 2020.
4. Dari segi definisi, penganggur merujuk kepada mereka yang tidak bekerja dalam mana-mana sektor sama ada formal mahupun tidak formal dan aktif mencari pekerjaan dalam minggu rujukan survei. Namun, berdasarkan kepada statistik bekerja sendiri yang mana majoritinya berada dalam sektor informal merekodkan penurunan sebanyak 161.5 ribu orang pada Mei 2020 kepada 2.42 juta orang berbanding bulan sebelumnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 27 OGOS 2020 (KHAMIS)

SOALAN

Minta **MENTERI PENDIDIKAN** menyatakan:

- (a) Apakah tugas dan fungsi Timbalan Menteri Pendidikan I dan Timbalan Menteri II masing-masing; dan
- (b) Apakah sebab YB Dato' Mah Hang Soon ditukar daripada Timbalan Menteri Pendidikan I kepada Timbalan Pendidikan II.

JAWAPAN

Tuan Yang di-Pertua,

Untuk makluman Ahli Yang Berhormat, tugas dan fungsi Timbalan Menteri Pendidikan adalah bagi membantu Menteri Pendidikan untuk melaksanakan tugas dan fungsi Menteri sepertimana yang telah ditetapkan menurut Perintah Menteri-Menteri Kerajaan Persekutuan (No.3) 2020 [P.U (A) 201/2020] yang diwartakan pada 9 Julai 2020. Tiada perbezaan dalam skop bidang tugas kedua-dua Timbalan Menteri tersebut.

Sepertimana Ahli Yang Berhormat sedia maklum, Kementerian Pendidikan Malaysia (KPM) mempunyai dua orang Timbalan Menteri. Gelaran jawatan bagi kedua-dua Timbalan Menteri adalah berdasarkan pewartaan Perintah Menteri-Menteri Kerajaan Persekutuan (No.3) 2020 [P.U (A) 201/2020] mengikut Susunan Keutamaan Persekutuan.

Perbezaan gelaran jawatan Timbalan Menteri Pendidikan I dan Timbalan Menteri Pendidikan II sama sekali tidak mencerminkan perbezaan bidang kuasa atau keupayaan kedua-dua Timbalan Menteri Pendidikan ini di dalam menggalas tugas yang penting dan mencabar di KPM. Kedua-dua Timbalan Menteri Pendidikan sentiasa komited dalam melaksanakan sebarang tugas yang dipertanggungjawabkan kepada mereka, terutamanya ketika negara berhadapan dengan krisis Covid-19. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS TAHUN 2020**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 27 OGOS 2020 (KHAMIS)

SOALAN

Minta **MENTERI PERTANIAN DAN INDUSTRI MAKANAN** menyatakan status keselamatan makanan Malaysia, keupayaan untuk menghadapi krisis makanan global dan langkah-langkah untuk meningkatkan penggunaan tanah untuk makanan selepas pengalaman krisis pandemik COVID-19.

JAWAPAN

Tuan Yang Dipertua,

Status keselamatan makanan (*food security*) negara termasuk bekalan makanan asas (beras, sayur, ayam, telur, daging dan ikan) berada pada tahap stabil dan terkawal walaupun negara menghadapi wabak COVID-19. Bagi sesetengah makanan seperti ayam, telur dan ikan telah mencapai tahap sara diri (SSL) melebihi 90%. Selain itu, negara masih bergantung kepada import beberapa makanan seperti beras, sayur (seperti cili, kubis dan bawang) dan daging lembu bagi memenuhi keperluan dalam negara.

Bagi memastikan bekalan makanan mencukupi dan terjamin, Kementerian Pertanian dan Industri Makanan (MAFI) sentiasa memantau bekalan makanan secara harian sepanjang tempoh pandemik COVID-19.

Informasi dalam negara yang diperoleh daripada agensi kerajaan, pemain industri dan usahawan tani serta informasi daripada atase pertanian di luar negara dipantau dan dianalisa secara berkala.

Selain itu, bagi memastikan konsistensi bekalan makanan yang diimport, beberapa langkah telah diambil seperti menggalakkan syarikat pengimport membuat kontrak jangka panjang dengan pembekal, mengenalpasti lebih banyak negara pembekal dan memudahcara prosedur import tanpa menjejaskan syarat-syarat sanitasi dan fitosanitasi (SPS).

Bagi meningkatkan keupayaan negara untuk menghadapi krisis makanan global dengan meningkatkan pengeluaran makanan tempatan, langkah-langkah berikut diambil untuk meningkatkan penggunaan tanah untuk makanan selepas pengalaman krisis pandemik COVID-19:

- a) Mengoptimumkan penggunaan tanah pertanian melalui Program Pembangunan Tanah Terbiar;
- b) Merancang aktiviti pengeluaran makanan melalui Program Kluster Tanaman Kontan, Program Tanam Semula Buah-buahan Terpilih dan Program Pembangunan Ladang Kontrak;
- c) Meningkatkan keberkesanan pengeluaran dengan menambahbaik infrastruktur dan kemudahan seperti jalan dan fasiliti ladang serta pengaliran dan saluran kawasan pertanian;
- d) Menggalakkan aplikasi teknologi moden seperti fertigasi, kilang tanaman, penggunaan dron, sistem pertanian pintar, pertanian tepat, *artificial intelligence* (AI), *big data* dan *internet of things* (IoT) bagi meningkatkan produktiviti; dan
- e) Melaksanakan model penyatuan tanah yang bersesuaian di kawasan sawah untuk penanaman padi secara berskala besar.

Langkah-langkah di atas akan dapat meningkatkan penggunaan tanah untuk makanan, produktiviti pengeluaran dan sekuriti makanan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHONG CHIENG JEN [STAMPIN]

TARIKH : 27 OGOS 2020 (KHAMIS)

SOALAN

YB TUAN CHONG CHIENG JEN (STAMPIN) minta **PERDANA MENTERI** menyatakan apakah Suruhanjaya Pencegah Rasuah Malaysia (SPRM) akan membuka semula kertas siasatan mengenai penjualan murah tanah Kerajaan Negeri Sarawak seluas 267 ekar di MJC Batu Kawa, Kuching, Sarawak kepada Standard Parade Development Sdn. Bhd.

JAWAPAN [YB DATO' TAKIYUDDIN BIN HASSAN, MENTERI DI JABATAN PERDANA MENTERI (PARLIMEN DAN UNDANG-UNDANG)]

Tuan Yang di-Pertua,

Untuk makluman Ahli Yang Berhormat, siasatan SPRM terhadap kes ini telah selesai dan pihak Peguam Negara telah memutuskan tiada tindakan pendakwaan dalam kes ini dan siasatan telah dihentikan [*No Further Action (NFA)*]. Hasil siasatan mendapati keterangan-keterangan yang diperolehi jelas menunjukkan tohmahan adalah tidak berasas dan tiada bukti untuk mengaitkan dengan pelakuan jenayah rasuah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN CHAN FOONG HIN
[KOTA KINABALU]**

TARIKH : 27 OGOS 2020 (KHAMIS)

SOALAN

YB TUAN CHAN FOONG HIN [KOTA KINABALU] minta **PERDANA MENTERI** menyatakan penggunaan sistem *Artificial Intelligence* (AI) bagi tujuan membantu menetapkan kadar hukuman bagi kes-kes jenayah seperti yang dimulakan di Mahkamah di Sabah. Sejauh manakah Majistret ataupun hakim terikat terhadap kadar hukuman yang dicadangkan, dan sama ada sistem AI ini mampu memberikan cadangan untuk binding over.

**JAWAPAN [YB DATO' TAKIYUDDIN BIN HASSAN,MENTERI DI
JABATAN PERDANA MENTERI (PARLIMEN DAN
UNDANG-UNDANG)]**

Tuan Yang di-Pertua,

Sejajar dengan perkembangan teknologi *Artificial Intelligence* (AI), Badan Kehakiman Malaysia menerusi Pejabat Ketua Pendaftar Mahkamah Persekutuan Malaysia (PKPMP) komited untuk menggerakkan agenda pemakaian teknologi AI dalam beberapa aspek sistem kehakiman. Sebagai permulaannya, Pejabat Hakim Besar Sabah dan Sarawak telah membangunkan garis panduan penghukuman bagi

kes-kes jenayah di Mahkamah Sesyen dan Majistret menggunakan teknologi AI dan *machine learning*.

Untuk makluman Ahli Yang Berhormat, garis panduan penghukuman menggunakan teknologi *Artificial Intelligence* (AI) yang telah diperkenalkan di Sabah dan Sarawak adalah suatu kaedah yang diperkenalkan oleh Badan kehakiman bagi membantu Hakim Sesyen dan Majistret untuk mengatasi dua permasalahan utama dalam penghukuman iaitu:

- (a) ketidaksamaan hukuman (wujudnya jurang perbezaan ketara antara satu hukuman yang diputuskan oleh seorang Hakim Sesyen/Majistret dengan Hakim Sesyen/Majistret yang lain bagi kesalahan yang sama); dan
- (b) kadar hukuman yang tidak setimpal berbanding kesalahan yang dilakukan (*Proportionate Sentence*) (hukuman yang dijatuhkan tidak seimbang atau setara dengan graviti kesalahan yang dilakukan). [Lihat PP v Muhari bin Mohd Jani & anor [1966] 3 MLJ 116].

Secara khususnya, garis panduan penghukuman adalah fokus kepada perkara yang berikut:

- (a) untuk mengurangkan jurang perbezaan hukuman yang dijatuhkan oleh sesuatu mahkamah;
- (b) untuk memastikan hukuman yang dijatuhkan adalah adil dan memadai (just dan adequate). Ini kerana setiap keputusan yang dibuat oleh seseorang Hakim Sesyen/Majistret adalah berdasarkan pengiraan kebarangkalian oleh AI berpandukan faktor-faktor yang berkaitan tanpa dipengaruhi oleh tekanan luar; dan

- (c) untuk memastikan hukuman yang dijatuhkan adalah mematuhi prinsip penghukuman.

Di samping itu, pemakaian AI dalam garis panduan ini adalah nilai tambah yang akan memastikan garis panduan yang digunakan pakai dalam penghukuman telah mengambil kira kelaziman hukuman yang dilaksanakan oleh Hakim Sesyen/Majistret secara majoriti dalam sesuatu kes menerusi data-data sedia ada. Ini kerana pembangunan sistem ini secara langsung akan mewujudkan bank data berkaitan jenis-jenis hukuman bagi kesalahan yang sama sebagai rujukan pantas (*quick reference*) seorang Hakim Sesyen/Majistret yang ditempatkan di seluruh Malaysia.

Pemakaian AI dalam garis panduan tidak akan mengambil alih peranan Hakim Sesyen/Majistret dalam membuat keputusan. Ini seiring dengan prinsip asas penghukuman yang melibatkan budi bicara kehakiman hakim atau Majistret sebagaimana yang telah diputuskan menerusi banyak kes Mahkamah.

Secara umumnya, undang-undang memberikan kuasa kepada Hakim Sesyen/Majistret untuk menjatuhkan hukuman kepada OKT melalui seksyen 183 Kanun Tatacara Jenayah: “ *If the accused is convicted, the Court shall pass sentence according to law*”. Selain itu, hukuman yang dijatuhkan oleh seseorang Hakim Sesyen/Majistret haruslah berpandukan fakta setiap kes dan berbeza dari satu kes ke satu kes yang lain. Dalam membuat keputusan, selain meneliti fakta kes dan faktor-faktor lain di sekelilingnya, seseorang Hakim Sesyen/Majistret akan membuat rujukan kepada kes-kes terdahulu yang pernah diputuskan oleh mahkamah yang sama ataupun mahkamah yang lebih tinggi.

Sehubungan itu, pembangunan sistem AI ini adalah berfungsi sebagai *quick reference* dan pemudah cara yang mengumpulkan semua data terkini mengenai kes bagi suatu kesalahan yang pernah didengar oleh mahkamah dan tren hukuman yang dikenakan. Rujukan kepada cadangan keputusan/penghukuman oleh AI bukanlah suatu yang

muktamad yang perlu diikuti oleh seorang Hakim Sesyen/Majistret. Seorang Hakim Sesyen/Majistret hanya merujuk kepada AI bagi mendapatkan tren hukuman bagi kes dan fakta kes yang lebih kurang sama yang pernah diputuskan di mahkamah sebelum ini.

Oleh itu, teknologi AI ini tidak akan mengambil alih kuasa sedia ada Hakim Sesyen/Majistret untuk membuat keputusan. Mahkamah boleh untuk memilih tidak mengikuti cadangan AI dalam membuat keputusan dengan mengambil kira fakta kes dan faktor-faktor lain disekelilingnya. Teknologi AI yang digunakan pada masa ini di Sabah dan Sarawak tidak diprogramkan untuk memberikan cadangan perintah 'binding over'. Cadangan hukuman setakat ini adalah terhad kepada hukuman denda, penjara dan sebat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' JOHARI BIN ABDUL
[SUNGAI PETANI]**

TARIKH : 27 OGOS 2020 (KHAMIS)

SOALAN

YB DATO' JOHARI BIN ABDUL [SUNGAI PETANI] minta **PERDANA MENTERI** menyatakan status terkini penubuhan Suruhanjaya Perkhidmatan Parlimen. Adakah Kerajaan sekarang bercadang untuk meneruskan usaha mewujudkan semula Akta Perkhidmatan Parlimen.

**JAWAPAN [YB DATO' TAKIYUDDIN BIN HASSAN, MENTERI DI
JABATAN PERDANA MENTERI (PARLIMEN DAN
UNDANG-UNDANG)]**

Tuan Yang di-Pertua,

Untuk makluman Ahli Yang Berhormat, draf Rang Undang-undang Perkhidmatan Parlimen telah disediakan. Kerajaan sedang meneliti dan memperhalusi penubuhan Suruhanjaya Perkhidmatan Parlimen Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB DATUK SERI SAIFUDDIN NASUTION
[KULIM BANDAR BAHARU]**

TARIKH : 27 OGOS 2020

SOALAN

Minta **PERDANA MENTERI** menyatakan bilakah Rang Undang-Undang 355 akan dibentangkan di Parlimen?

JAWAPAN

**YB SENATOR DATUK DR. HAJI ZULKIFLI MOHAMAD AL-BAKRI,
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

Untuk makluman Ahli Yang Berhormat, kerajaan sentiasa meletakkan prioriti kepada pemerkasaan Mahkamah Syariah, bagi memartabatkan institusi perundangan Syariah di Malaysia. Sebagaimana yang telah dimaklumkan ketika penggulungan perbahasan Titah Diraja pada 10 Ogos 2020 di Dewan yang Mulia ini, pindaan bagi Akta Mahkamah Syariah (Bidang Kuasa Jenaya) 1965 akan dilakukan selepas beberapa proses penting dilaksanakan terlebih dahulu. Ini penting agar Akta ini dapat dipinda dan dibentangkan mengikut tertib dan teratur mengikut lunas Perlembagaan Persekutuan. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHA KEE CHIN [RASAH]

TARIKH : 27 OGOS 2020 (KHAMIS)

SOALAN

TUAN CHA KEE CHIN [RASAH] minta Perdana Menteri menyatakan apakah pendirian Kerajaan Perikatan Nasional (PN) terhadap 'Surat Sokongan' yang disebutkan oleh YB Timbalan Menteri KBS baru-baru ini, sama ada 'Surat Sokongan' sebegini dibenarkan oleh Kerajaan PN dan apakah Kerajaan PN bersetuju dengan pendekatan 'Surat Sokongan' sebegini.

**JAWAPAN: [YB DATO' TAKIYUDDIN BIN HASSAN, MENTERI DI
JABATAN PERDANA MENTERI (PARLIMEN DAN
UNDANG-UNDANG)]**

Tuan Yang di-Pertua,

Untuk makluman Ahli Yang Berhormat, pada tahun 2010 Kerajaan telah pun mengeluarkan Garis Panduan Tindakan ke atas Sokongan yang Diterima Daripada Pemimpin Kerajaan, Individu Berpengaruh atau mana-mana Orang Mengenai Sesuatu Urusan Kerajaan yang ditandatangani oleh Ketua Setiausaha Negara (KSN) bertarikh 8 Mac 2010.

Garis panduan ini bertujuan untuk menerangkan kepada penjawat awam mengenai langkah-langkah yang harus diambil dalam menangani permohonan sokongan yang diterima daripada pemimpin Kerajaan, individu berpengaruh atau mana-mana orang mengenai sesuatu urusan

Kerajaan. Ini bagi memastikan penjawat awam tidak terkeliru, terpengaruh dan mengekalkan integriti di dalam mempertimbangkan sesuatu permohonan.

Bagi penjawat awam, mereka dihalang menggunakan pengaruh surat sokongan daripada mana-mana Anggota Pentadbiran. Sebagai contoh permohonan pertukaran tempat kerja pegawai. Sekiranya ia berlaku, penjawat awam tersebut boleh dikenakan tindakan tatatertib oleh Ketua Jabatan berdasarkan Peraturan 4(2)(h), Peraturan-Peraturan Pegawai Awam (Kelakuan dan Tatatertib) [P.U.(A) 395/1993]:

“membawa atau cuba membawa apa-apa bentuk pengaruh atau tekanan luar untuk menyokong atau memajukan tuntutan berhubungan dengan perkhidmatan awam, sama ada tuntutan itu adalah tuntutannya sendiri atau tuntutan anggota-anggota perkhidmatan awam yang lain”

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 27 OGOS 2020 (KHAMIS)

SOALAN

Minta **MENTERI PENDIDIKAN** menyatakan apakah keadaan Sekolah Jenis Kebangsaan (C) Malim di Melaka dan murid-murid yang tercedera akibat daripada hujan rebut petir yang melanda pada 11 Ogos 2020, termasuklah apakah langkah-langkah awal yang diambil Kementerian untuk membantu sekolah dan murid-murid tersebut selain peruntukan tambahan untuk kerja-kerja pemulihan.

JAWAPAN

Tuan Yang di-Pertua,

Pada 11 Ogos 2020, Kementerian Pendidikan (KPM) telah menerima laporan mengenai kerosakan bumbung dan struktur bangunan SJKC Malim, Melaka akibat dilanda ribut. Dalam kejadian tersebut, seramai 29 orang murid Tahun 2 dan Tahun 5 mengalami cedera ringan. Enam (6) orang murid daripada murid yang cedera telah dihantar ke Hospital Besar Melaka manakala 23 orang murid dihantar ke Klinik Kesihatan Tengkeru. Setelah mendapat rawatan, semua murid terlibat telah dibenarkan pulang ke rumah masing-masing.

Berikutan insiden berkenaan, SJKC Malim telah ditutup sehingga 14 Ogos 2020 untuk membolehkan kerja-kerja pembersihan dan pemulihan bangunan dilaksanakan.

Sekolah telah kembali beroperasi semula dengan melaksanakan dua sesi persekolahan pada 17 Ogos 2020 kerana kekurangan bilik darjah. Murid Tahun 4, Tahun 5 dan Tahun 6 ditetapkan untuk hadir sesi pagi, manakala murid Tahun 1, tahun 2 dan Tahun 3 adalah pada sesi petang.

Smart Supporting Team Jabatan Pendidikan Negeri (JPN) Melaka telah mengadakan sesi kaunseling kepada semua murid yang cedera pada 18 Ogos 2020. Pihak sekolah akan terus berusaha untuk membantu murid yang menghadapi masalah trauma akibat insiden berkenaan. Antara usaha tersebut adalah seperti membuat rakaman video di kelas atau mengadakan program ziarah cakna agar murid terlibat kembali bersemangat dan berkeyakinan untuk ke sekolah.

Untuk makluman Ahli yang Berhormat, kerja-kerja pemantauan dan penilaian keseluruhan bangunan sekolah telah disempurnakan oleh pihak Bomba dan Penyelamat serta Jabatan Kerja Raya (JKR) negeri Melaka. Di samping itu, JPN Melaka dan Pejabat Pendidikan Daerah (PPD) Melaka Tengah telah membuat penyelarasan kerja-kerja pembaikan dan strategi pengoperasian semula sekolah bersama-sama dengan pihak pentadbir sekolah, JKR, Bomba dan Penyelamat, Lembaga Pengelola Sekolah (LPS), dan Persatuan Ibu Bapa dan Guru (PIBG).

Anggaran kos membaik pulih kerosakan pada bangunan yang terlibat adalah sebanyak RM250,000, merangkumi kos pendawaian dan juga kos membaiki struktur bumbung.

Berdasarkan penilaian yang dibuat oleh JKR Melaka pihak LPS telah mengemukakan permohonan peruntukan kepada KPM. Sehubungan itu, KPM sedang menguruskan penyaluran sumbangan bantuan bagi membantu pelaksanaan kerja-kerja pembaikan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN
DARIPADA : Y.B. TUAN WILLIAM LEONG JEE KEEN
[SELAYANG]
TARIKH : 27 OGOS 2020 (KHAMIS)

SOALAN

TUAN WILLIAM LEONG JEE KEEN [SELAYANG] minta **MENTERI KEWANGAN** menyatakan alasan mengapa banyak percubaan terdahulu kepada pemulihan/penstrukturan semula Malaysia Airline Berhad gagal dan sama ada Kerajaan mencadangkan untuk membiayai semula, menjual atau menutup syarikat penerbangan negara.

JAWAPAN

Tuan Yang di-Pertua,

Sebelum ini Malaysia Airlines System (MAS) telah melalui pelbagai fasa penstrukturan semula termasuklah penstrukturan semula MAS melalui *Widespread Assets Unbundling* (WAU) pada tahun 2002, pelaksanaan *Business Turnaround Plan 1* – BTP1 pada tahun 2006 dan seterusnya *Business Turnaround Plan 12*– BTP2 pada tahun 2008. Susulan pelaksanaan BTP1 dan BTP2, MAS telah mencatatkan keuntungan mulai pada tahun 2007 sehingga 2010.

Walau bagaimanapun, MAS kembali mencatatkan kerugian pada tahun 2011 dengan kerugian bersih sebanyak RM2.52 bilion disebabkan kelembapan pasaran industri penerbangan global terutamanya bagi perkhidmatan kargo dan juga peningkatan kos operasi merangkumi kos

bahan api dan kos bukan bahan api seperti peruntukan pemulangan pesawat, peruntukan *impairment* pesawat (*freighter*) dan peruntukan stok usang. Sehubungan itu, pelan pemulihan MAS telah dilancarkan pada 29 Ogos 2014 yang merangkumi pelan penstrukturan semula secara menyeluruh dalam membina semula industri penerbangan negara.

Berdasarkan pelan pemulihan ini, MAS telah distruktur semula kepada Malaysia Airlines Berhad (MAB) yang ditubuhkan pada 1 September 2015 sebagai subsidiari Malaysia Aviation Group Berhad (MAGB). MAGB dimiliki sepenuhnya 100% oleh Khazanah Nasional Berhad (Khazanah) dan Kerajaan tidak mempunyai sebarang pegangan saham dalam MAGB. Sehubungan itu, sebarang cadangan pengambilalihan mahupun penstrukturan semula MAGB dan MAB adalah tertakluk kepada kelulusan Lembaga Pengarah Khazanah.

Berikutan penularan Wabak Covid-19 dan seterusnya tindakan pengawalan pergerakan yang dikuatkuasakan secara langsung telah memberi kesan teruk kepada perkhidmatan pengangkutan udara serta pemulihan syarikat-syarikat penerbangan di seluruh dunia. MAGB kini sedang merumuskan suatu rancangan pemulihan bagi mengatasi kemelut yang melanda. Khazanah, sebagai pemegang sahamnya pula akan terus bekerjasama dengan MAGB dan Kerajaan untuk mengenal pasti penyelesaian strategik terbaik bagi syarikat penerbangan negara tersebut.

Sekian, terima kasih.